

共同經課 - 1 箴言一章二十節~三十三節

20 智慧 tī 街路大聲叫， Tī 開闊 ê 所在出伊 ê 聲。21 Tī 鬧熱 ê 街路頭，大聲叫， Tī 城門口， tī 城內，講出伊 ê 話；22 講， 戇直人 ài 戇直， 侮慢人 ài 侮慢， 愚戇人怨恨知識， beh 到甚麼時 ah？23 我責備 lín， lín tiòh oát-tng； 看 ah， 我 beh 用我 ê 神降落 hō lín， 用我 ê 話指示 lín。24 因為我 bat 叫， lín m̄聽； 我 bat 伸手， 無人致意；25 Lín 反 tng 看輕我一切 ê 勸解， M̄肯受我 ê 責備。26 所以 lín tú-tiòh 患難， 我 beh 清笑， Lín tú-tiòh 驚惶， 我 beh lāng-gīn。27 Lín ê 驚惶親像狂風吹來， Lín ê 災禍親像捲螺風掃來， 患難痛苦臨到 lín 身上。28 Hit 時 in beh 求我， 我 m̄聽， 切切 chhē 我， chhē boē tiòh。29 因為 in 怨恨知識， 無歡喜敬畏耶和華。30 M̄聽我 ê 勸解， 藐視我 ê 責備。31 所以 in beh 食家已行做 ê 果子， Hō in 得 tiòh 所計謀到飽厭。32 戇直人 ê 悖謬 beh hō伊致到死， 愚戇人安逸， beh hō伊致到滅無。33 獨獨聽 thàn 我 ê beh 安然 khiā 起； Beh 享受安靜， 無驚 tú-tiòh 災厄。

共同經課 - 2 詩篇十九篇

1 大衛 ê 詩；交 hō 樂官。1) Chiah-ê 天講起上帝 ê 榮光， 穹蒼報揚伊 ê 手所做 ê。2 Chit 日 tùi hit 日發出言語， Chit 暝 tùi hit 暝傳出知識。3 無言無語； In ê 聲無 thang 聽見。4 In ê 準繩遍 tī 天下， In ê 言語到 tī 地極。上帝 tī in 中間為 tiòh 日頭安置帳房。5 日頭親像新 kiáⁿ 婿出伊 ê 房， 亦親像猛勇 ê 人歡喜走伊 ê 路。6 伊 tùi 天 ê chit-pêng 出， Séh 到天 ê hit-pêng； 無一項物 khng 密， 無得 tiòh 伊 ê 熱氣。7 耶和華 ê 律法齊全， 能 hō 人 ê 心神活起來； 耶和華 ê 干證確實， 能 hō 戇人有智慧。8 耶和華 ê 教示正直， 能 hō 人 ê 心歡喜； 耶和華 ê 命令清潔， 能 hō 人 ê 目矚光明。9 敬畏耶和華 ê 道理是清氣， 永遠存在； 耶和華 ê 判斷真實， 一概是公義。10 比金， 比 choē-choē 好金， khah thang 欣慕； 比蜜， 比蜂房滴落來 ê 蜜 khah 甜。11 Koh 你 ê 奴僕 tùi chiah-ê 受警戒； 守 chiah-ê 有大賞賜。12 Chī-chūi 會知伊 ê 失錯 ah？ 求你除去我暗靜 ê 過失。13 求你阻止你 ê 奴僕， 無故意犯罪； M̄准 hit-ê 罪惡管轄我； 我就完全， 免犯大罪。14 耶和華我 ê 石磐， 救贖我 ê 主 ah； 願我 ê 嘴所講 ê， 心所想 ê， tī 你 ê 面前得 tiòh 接納。

共同經課 - 3 雅各書三章一節~十二節

1 我 ê 兄弟 ah， m̄-thang choē-choē 人做先生， 因為知咱 beh 受 khah 重 ê 審判。2 因為咱眾人 tī choē-choē 項跋倒。Tī 講話無跋倒 ê， 就是做完全 ê 人， 也會約束伊 thong 身軀。3 咱 hē 馬咬韁 tī 馬 ê 嘴， hō in 順 thàn 咱， 就管轄 in thong 身軀。4 Koh， 你看， hiah-ê chhūn， 雖然 hiah 大 chiah， hō 大風 Sàui， 猶原是用細細 ê 大雨互伊 tng-oat， 照 tãi-kông ê 意思所 ài。5 Án-ni 舌是細細 ê 體， iáu-kú 講大 oē。你看， 小 khoa ê 火燒樹木 joā choē ah！6 舌就是火， tī 咱百體中做不義 ê 世界， phah lâ-sâm thong 身軀， 一生 ê 行動 tùi 伊發火； 伊家已 ê 火是 tùi 地獄發。7 因為 ták 類 ê 走獸、飛鳥、蟲 thoā、水族， lóng 受制壓， 也已經 hō 人類制壓。8 獨獨舌無人會制壓； 是無停歇 ê pháih 物， 有死 ê 毒滿滿。9 咱用伊 o-ló 主， 就是父， koh 用伊咒詛人， 就是照上帝 ê 款式來創造 ê。10 O-ló kap 咒詛 siāng 一個嘴出。我 ê 兄弟 ah， 這是 m̄應該。11 水泉 kiám 會 tùi siāng 一khang 流出甜 ê 苦 ê mah？12 我 ê 兄弟 ah， 無花果樹能生橄欖 mah？ á 是葡萄樹能生無花果 mah？ án-ni tui 鹹 ê 流出 chiaⁿ-ê 也 boē-oē。

共同經課 - 4 馬可福音八章二十七節~三十八節

27 耶穌 kap 學生出去到該撒利亞腓立比屬 hiah-ê 鄉社； 路裡問伊 ê 學生講， 人講我是 chī-chūi？28 In kā 伊講， 行洗禮 ê 約翰； 也有人講， 以利亞； koh 有人講， 先知中 ê 一個。29 伊 koh 問 in 講， 若是 lín 講我是 chī-chūi？ 彼得應伊講， 你是基督。30 伊就禁戒 in 莫得將伊 ê 事 kā 人講。31 就教示 in 講， 人子的確 tiòh 受 choē-choē 苦楚， hō chiah-ê 長老、祭司頭、經學士棄 sak， koh 受害死， 過三日就 koh 活。32 耶穌用 chit-ê 話明明 kā in 講。彼得牽來責備伊。33 但是伊 oát-tng 身看伊 ê 學生， 就責備彼得講， 撒旦， 退去我 ê 後面； 因為你所想 m̄是上帝 ê 事， 是人 ê 事。34 就叫眾人 kap 伊 ê 學生來， kā in 講， 若有人 ài tè 我， 就 tiòh 看無家己， giā 伊 ê 十字架， 來 tè 我。35 因為見若 ài 救伊 ê 性命 ê beh 失落伊； 見若為 tiòh 我 kap 福音來失落伊 ê 性命 ê beh 救伊。36 人若得 tiòh 全世界， 來喪失伊 ê 性命， 有甚麼利益？37 因為人 beh 出甚麼來對換伊 ê 性命？38 凡若 tī chit-ê 姦淫有罪 ê 世代掠我 kap 我 ê 會做見笑 ê， 人子用父 ê 榮光 kap chiah-ê 聖 ê 天使來 ê 時， 也 beh 掠伊做見笑。